

四庫全書

集部

欽定四庫全書

集部

甬上耆儒詩卷三

詳校官石中允_臣薩敏

主事銜_臣徐以坤覆勘

總校官庶吉士_臣朱鈐

校對官學正_臣常循

謄錄監生_臣趙廷璋

欽定四庫全書

甬上耆舊詩卷三

監察御史胡文學編

大德至大間以袁文清公為制作手馬易之產自回
鶻以從學來居甬上遂稱江南一絕此亦一奇也今
合所錄十二家為一卷

訓導鄭先生芳叔

字德仲家貧嗜學嘗從人假讀輒自繕寫積數十百

卷元初徧遊遺老之門搜輯故事日識見聞所從游
門下甚多經其指授俱有師法再任郡學訓導卒所
遺詩文四十餘篇

菜詩

梁肉人間夢寐空坐間猶得誦涪翁一簞樂意齏鹽足
五畝生涯菽粟同剪韭未能忘夜雨思蓴豈必待秋風
但知不厭其中味日有春生老圃中

學士袁文清公楠

字伯長袁氏最為世族公少負異才讀先世遺書至
窮日夜初事戴剡原稍長在王深寧先生之門復從
舒岳祥游盡傳諸公之學既家有賜書又親見中原
大獻得接風流故其學最為有本以辟茂異授麗澤
書院長用薦入國史院歷翰林院直學士侍講早引
年歸里公在翰林三十年上郊祀定制十議纂脩三
朝大典酌定憲令疏請購宋遼金三代遺書一時制
詞碑版高文典冊多出公手家居以後脩闢南園故

址結小亭讀書其中翰墨所傳極于海內卒年六十
二贈行叅知政事陳留郡公自宋南渡而後吾鄉學
者以多識相尚文清得王氏之傳其于近世禮樂之
因草官閥之選次朝士大夫之族系九流諸家之畧
錄俱能溯源執本得其旨歸淞河以東于斯為盛公
嘗言余少讀書有五失泛觀而無擇其失博而寡要
好古人言行意常退縮不敢望其失懦而無立纂錄
故實一未終而屢更端其失勞而無功聞人之長將

疾趨而從之輒出其後其失欲速而好高喜學為文
未能蓄其本其失又甚焉者也公所自責俱深中學
者之弊故具述之至公歿二十餘年會脩宋遼金三
史遣使者求郡國遺文故事唯公家上藏書數千卷
足備典實至今袁氏尚盛余初選此集其後人即手
鈔世傳遺草見示數百年文獻未墜于地斯可謂故
家矣

飲酒雜詩

夜黑雪初白高卧益自怡起看庭前柳冉冉青春姿長
松在西山鬚髮流銀澌豈不念歲苦老壯當固持事至
無獨戚時來詎人為得酒且深醉淵明果吾師

京中二十載酒中有深歡大雨即閉戶朔風嘗解鞍客
至輒笑之是豈宜居官振容筮神著鴻飛漸于磐百歲
苦世短萬鍾非我干所以東方生吏隱神益完

陽鳥乘南雲飄飄振奇翮迫此稻梁謀居移遂成客愧
我食京塵誓墓志未得雙峯十丈松下有千歲魄當年

侍蓬瀛香芸森寶冊高齋集遺編朱墨猶手澤戰兢愧
匪承永念在行役

少欲觀滄海下取珊瑚枝穹龜負奇文靈鱗揚朱鬣盪
舟不能往寶氣時紛披有客方壺來授簡雲差差一以
參太極九以師包犧振衣海神泣舉觴山鬼移

少觀五岳形五性各有殊神州養深知百靈受馳驅申
申安樂翁定洛為中居契孫乃九遷舜詎平陽都神京
屹金臺五雲玉笑渠始知天經旋積氣為堪輿

家隣天台山云有二子巖巍我太古石纖脩矗雲尖上
棲西竺僧雪色垂須髯二子與之游作詩清且嚴乳花
散素霓瀑布飛銀簾醉醒夢見之謂我何留淹

南檐孤竹生歲暮何青蒼豈不念道里因之推雪霜夷
齊盧龍居胡為乃名揚入水蛤有丈踰淮枳彌芳受性
諒匪移臨風浮吾觴

弱冠不飲酒篝燈橫玉繩或云酒中趣湛湛浮雲蒸棗
書試其言果若烏輪升天根轉暗雷堅城為之崩妙言

粲瓊屑逸興追飛鷹醉鄉倘可居無功乃真朋

醉中發莊語爛如錦中花急急抱蘆雁肅肅投林鴉欲
別意深省瞑目不復譁愧彼獨醒人揣摩生咄嗟下馬
暮入門雙目含飛沙醉者忽復悟振衣正烏紗

江梅生空林歲晏美無度挈身踰朔陽愧獨此室處羶
房望朝陽耿耿不得語雕籠粲珍禽悵望秦鄉樹爰居
東門止盛饗非素茹臨風嗅其英雅志懷故土

嗟我白雲阡種松在山腰散之不盈掬離離如麥苗迎

陽漱靈津參差拂雲霄露重碧天淨玄鶴時來巢俛仰
三十年鬢齒日以彫寄聲謝玄鶴相期躡宮堯

次韻虞伯生夜坐二首

炎晶爍草露木末望西顙靜躁誰為尸翕忽紛寸抱志
士法天運炳燭不在老羣經固其郭積神以為寶陋彼
多言生希名太玄草山林詎心違歲月付幽討擾擾徒
為名努力在此道

地氣環中州橐籥均宇內中宵炎溽頻露坐猶憤憤遠

窮太古雪欲往終有徠馳神極寥廓我筆不可載栖形
竹素園萬化等歷塊相期江湖深慎弗寒暑礙秋風起
天末紉蘭結幽佩

渡淮寄養浩

竹清寒房靜殘月在西壁悄悄燈影微尸坐棄枕席井
華飲蟾蜍玄雲成五色明知非世謀精詣在六籍我行
長淮浪凍樹挾春碧夢子白紵寬雙眸炯空激書來屢
在手此意何的的數回不成歡遠別乃復惻歸雁臨風

翔先之寄深憶

送友教授閩中

蔚蔚太古樹聚生散琅玕盛時炳陽德寥落欬歲寒天
風西北來東海繁層瀾芳朽各有性盛衰詎無端貿貿
氷上屨黯黯塵中冠宿志不得酬奮飛輯其翰伊南蹇
一士羈鴻河之千手持大雅篇八音佐王官墻陰卧朝
日薄飯不滿盤邂逅喜我同金石生肺肝出處非故意
低徊耿相看閩山渺雲海東望通三韓居夷聖有在取

琴為君彈

懷伯生

春雨消露塵春風散林纈蕩蕩長門中客子千萬轍城
陰有一士淡食羹不啜采彼松上露煮石化晴雪沉冥
護真性觴至那復說向來舌本談今作耳根熱維南有
樛枝巖溜滋百結在德良自昉居屯詎為折念此長夜
深寒光吐殘月

育王珙禪師示寂二紀嶼上人回山中因寄塔

主

石塔累荒土月落永稜稜永懷跼趼松風吹不鷹山
房舊淨供素壁一枝藤語寂絕禪觀機深超祖乘擊石
并新火諸天化為燈上有白玉峯丹梯杳難登黃流鉅
野漲虎嘯懸厓崩斯道倘未泯微言足搜徵

董生靈上人以叔載韻見貽再次韻

關河一轍迹耿耿明大江五方各異俗中州誠駿龐吾
欲上帝閭帝閭不敢撞終然返初服養佚歸海邦

鞞帽成威施逆耳風其喈昂然望南山愛彼日夕佳朝
來何所見萬馬盈天街所以巢居子終然養澄懷

聖師禪林秀宛在諸天閣當其調護時危石繫朽索作
賦極剪裁衆物各有託氤氲荆山玉洋洋咸池樂

玄圃有琪樹不使枝葉繁譬彼績學人芟蕪養天根歲
暮雪霜至銅柯生晏溫一為梁棟才落落縣金門

吾師深寧翁屹屹太華高佳咲時一遊不使凡羽翺方
壺貯神藥變為五色膏服之生羽翰陋彼東方桃

少壯忽自摧振容上詞場鵝膏淬寒鋒談笑摩堅疆藉以襍纖羅貯以白玉堂辱贈莫知報因之結中腸

芳思亭

大父尚書公治圃南郊有堂亭凡十五方池脩廊屈折便宜雨甚亦無礙遊事逮今荒廢踰四十年故基陳迹不可復考近築一亭襍植花木廣不踰畝髣其萬一名之曰芳思玩其英華將以紬繹志興翰墨有紹是則先公之志作詩示瑾瑾并求親友同賦

侃侃尚書公投紱理泉石五堂適寒暑十亭送昕夕瓊
英玄圃秀美蔭佳樹碧脩廊不受雨來往隨履烏紅雲
漲方塘丹霞耀翠席嘉魚黃金掌瞥見渺莫測辛勤三
十年深逝晦朝迹遺訓示子孫樹藝比其德浮雲變須
臾百幻倏消蝕空餘鄭公莊耕稼給衣食緬彼行樂時
衆植各有職以茲一畝園髣像見疇昔幽葩與羣卉生
意日不息朝陽漱靈根三咽妙紉繹曠懷事幽賞誓矣
躬六籍

送邵元道四首

仲連佳世姿揮手却秦軍掩袂停白日登車抗浮雲射
書誠草草孤城死生分辭榮敦厚俗矯抗離其羣

虞卿日轉丸揣事精微茫士危見交態窮愁名益光黃
金散逝水白璧凝飛霜丈夫有定志得失非豫防

梅生一尉微喋喋正天紀道心洞玄化削跡無妻子龍
變孰為馴蟬蛻乃真止松迴風謖謖水落石齒齒

襄陽孟浩然拂衣歸故山逍遙巖壑深流咏遺人間舉

袖林花發擊楫江鷗還鹿門看碧流入夢日潺潺

越船行

越船十丈青如螺小船一丈如飛梭平生不識飄泊苦
旬日此地還經過三江潮來日初晚九堰雨慳河未滿
當時却解傍朱門醉眼看天話長短年來官府催發綱
經月辛苦鬢已霜布裘漫作解貂具入門意氣猶猖狂
自古魚鮭厭明越明日今朝莫論說買魚沽酒不計錢
被髮江湖傲明月勸君莫作越船婦一去家中有門戶

沙上攤錢輸不歸却向隣船盪雙舫

挽王尚書四首

秋水雙蓮孕英英吐異芬詞章納雲夢禮樂訂河汾
詔三軍泣清名四海聞西峯傾落日乘鶴叩蒼雲

晚歲艱難意衡門老病身蜀山迷望帝楚澤痛靈均
皮弁終辭召深衣晚任真蓋棺今已定千載有遺民

燕說經生濫齊諧學究輕微言空有意獨拍已無聲
墨澤雞林貴青氈虎觀榮新銘前進士幽抱付誰明

再世登龍舊淵源許管窺西山遺正緒東澗結冥知腹
笥名空在眉黎壽竟違重歌妾薄命含淚滴塵甌

送蘇子寧赴嶺北行省郎中

貂帽護寒沙冰天閒歲華斷溪駝聽水密雪犬行車雲
盡難尋雁春深未識花昔人奇絕處八月解乘槎
往歲經遊地寒蕪碧燐深雲開山後陣水咽隴頭吟雪
白羶房重天清羽檄沉重華新雨露悲喜候車音

書懷寄從子瑛二首

越公舊築鄞江宅風捲飛花劫火新子竟尋真餐白石
我方作史玩青春金張螭綬元欺世王謝烏衣亦可人
誓墓政須堅晚歲雙峯擁髻碧嶙峋

當年羣從玉參差炙輅談天不數奇剪葉舞空山鬼泣
唱籌量日歷人疑深春柳下爭飛騎小雨花前鬪奕棋
我最少年惟閉戶篝燈煮藥學題詩

送王繼學馬伯庸

玉京高處雪流脂連轡難翹綠鬢垂蹀躞有泥歌獨漉

琵琶無夢說相思黑河巨樂催填譜白海名花擬進詞
羽獵上林俱罷賦卿雲何以報熙時

淺波平疊磧漫漫拂嶺青帘罨畫看羶屋起營羊腴熟
土房催頓馬醺乾桐官走驛傳金枕水正分奩貯玉盤
莫上鄉臺望南北白雲微處是槍竿

送華山隱者

黑髮祠官佩水蒼萬松深處響琳琅黃柑有法能為酒
紫朮無飢可代糧喚鶴舞空山月冷檄龍吹雨海風涼

瑤池欲問長生訣
碧澗研珠寫綠章

游護聖禪寺

獨秀峯前倚檻看
翬飛樓閣出巔巔
荒墳虎墓唐僧骨
古井龍窺漢尉丹
荷沼秋枯霜鏡淨
松林風撼夜濤寒
年年四月黃梅熟
猶憶調羹齒頰酸

葛仙翁移居圖

翁媼相攜入翠微
轉頭猶有可憐兒
丹砂不是神仙藥
句漏歸來鬢已絲

龍挂詩

黑雲壓江江水躍
乖龍時挂青旗脚
須臾捲水上青天
蛺蝶蜻蜓雨中落

春俠口號

松林縱獵金毛鷹
花街行春銀面馬
夜宿娼樓酒未醒
飄風吹落鴛鴦瓦

袁處士哀

字德平文潔公燮之後
善書法常撰書學集要亦工

詩隱居沙家山不出與文清公為族兄弟常因游東
湖作聯句千餘言而其餘詩失傳亦足歎也

東湖聯句

舊學蕪三史新居隘一廛煎熬魚煦輒奔竄鳥驚弦擬
整登山屐楠須乘破浪船出關塵已遠哀過埭意爭先

歸舶攢桅聚楠浮梁斷鎖懸潮渾江葑沒哀膝破岸藤

纏戍柵依樟密楠官隄砌石平機間蓂喚織哀砧響雁

傳箋乍靜喧煩耳楠猶欣輾轉眠鵲橋華屋廢哀鷺滙

曲河連稻實閒農具

楠

嵯巖絕竈烟急裝紅蔽膝

哀 辦

髮黑垂肩估客編文具

楠

村家緯木棉生涯疲割剥

哀

世路窘迫遭龕室休行客

楠

郵亭歎逝川羈鷹圍獵罷

哀 聯騎縱遊旋路轉分支港

楠

川明幻別天鄮城花已

閣

哀

甬水恨空傳數堦搜唐刻

楠

題詩紀宋編會堂夫

子像

哀

汲井隱居泉海眼藏龍窟

楠

山心射鹿田水鳴

知棹急

哀

岸走訝途遷隱見岡巒近

楠

低昂橘柚鮮青

山猶五里

哀

綠樹已千年歸犢如雲擁

楠

閒花似火然

苧裳游女淨

哀

蘆管野伶妍繫纜披團氎

楠

循溪捨竹

篴徑香幽菊傲

哀

土薄假山偏燈火精廬古

楠

衣冠故

物全登門論子姓

哀

對坐敘姻聯金魄節窻影

楠

丹砂

養井淵螢光飛熠熠

哀

鶴唳翼娟娟斗室橫烏几

楠

方

牀藉素氈魂清時入夢

哀

意得竟忘筌過墓成扃戶

楠

遵湖復扣舷滄洲遠秀麥

哀

真隱拱朱椽碧洞諸天杳

楠

蒼珉帝畫鵲梯危頻縮武

哀

像寂且擎拳紫府商林

歇

楠

丹書漢澤宣銅鋪苔暗蝕

哀

徑度燕新穿倦鳥辭

枯柳

楠

游龜戴早蓮古奩開漱澀

哀

斜穀縞漪連淤塞

焚排劍

楠

洲乾蓼糝鈿官徵都尉粟

哀

漁納水衡錢玉

絕山靈泣

楠

祠荒野老憐紙旗靈社開

哀

草廣曲河填

此去真聊爾

楠

斯言信偶然柏幽藏魍魎

哀

潭暗袞蜿

蜺雅興呦呦鹿

楠

勞生跼跼驚攬芳真嚼蔗

哀

寫絕擬

和鉛轍迹蕪青翳

楠

麻綦泉耳綠貞娥鬱龍虎

哀

冑相

紹貂蟬宰木分神隧

楠

思亭列石筵風霜翁仲老

哀

香

火釋迦專楚些招歸魄

楠

王官慨昔賢拜峯誰控勒

哀

篆水自書玄屈曲東西路楠縱橫南北阡繁華眸轉電

哀得失口垂涎絮酒悲宗老楠囊空想地仙闕連梵

咀哀市近接漁膾破露生衣濕楠登坡弱足胼卧牛遺

扁暗哀眠鹿繪容虔金刹從茲訪楠塵纓合少蠲伐山

靈運躁哀衝雪子猷顛檜煖蜂偷蜜楠蘆寒鳥啄繇蟹

稀螯數百哀樵影斧論千淡日收人影楠空風漲土堦

蒲葵遮望眼哀繭紙論吟篇除道家僮懶楠偷程地主

僂蟻封徒曲折哀駒隙漫拘攣碎石行行直楠脩篁个

个員深藂驚雉翠

哀

夾徑聳楠榭濯錦芙蓉艷

楠

飄香

桂子駢雕楹回複道

哀

斜閣布陶磚刻畫功難盡

楠

翬

飛勢欲翩奉常陳劍履

哀

尚服賜紘紵憶織鮫人網

楠

帷凝蜀國旃妖姝汚粉頰

哀

土偶聳高顙祛石當時力

楠臨淵昔日權只今留舊業

哀

何處覓幽禪燕領風雲

會

楠

龜蛛星日躔蛛窠綠袞服

哀

風迹上朱籩累僕供

朝沃

楠

因僧進午餐佳城蹲五鳳

哀

素業廢三鱣勝已

窮蘭若

楠

名猶慕倕侏臺空霞佩冷

哀

殿寂羽幢薦觀

主何年住楠真官永世鍵畫梁誰復葺哀美蔭久頻脫

木已非真李楠僧宜賤壽錢悲來雲幕幕哀恨極水潺

潺重嶺藏椒屋楠斜暉拾蕙楊暫歸心未穩哀欲去眼

空眩憶昔窮誅闢楠如今猛棄捐慈山名轉赫哀困填

恥誰湔積翠林霏悄楠流波海月涓遠鐘催宿鳥哀橫

笛挂烏犍柱笏風騷賈楠攜壺主僕牽情懷同黍醴哀

臭味比香荃圓澤休論舊楠華胥復記前乳彪號澗側

哀良狄嘯雲巔惇族盤餐盛楠通家笑語闌鵲青歸槩

熟

哀

舴艋逆風沿濟勝應難促

桷

臨流且賦遄歸夷歌

逝矣

哀

漁父卜終焉紫檀遮籬角

桷

丹楓壓廟堧鍊形

金骨化

哀

團礧土砂堅破屋啼山鬼

桷

荒碑立老鸛歲

時羞野賽

哀

水旱禱靈筭西帝澄金宇

桷

東湖鑄玉璫

涼颼舟泛泛

哀

晴日草芊芊射鴨縈長弋

桷

叉魚擊短

鋌酒廬橫野甕

哀

屠几列肥牲街市僧袍麗

桷

招虛販

鼓蕭登臨難婉戀

哀

想像費平銓更欲南窺海

桷

誰能

北跨燕同心雙繭緒

哀

徇俗走珠蟻朗鑒詞聯寫

桷

玄

談茗更煎翺翔誠放浪

哀

匍匐類狂孱已乏凌雲句

梅

時思縮項鱖還家如夢寐

哀

共點曉霞邊

梅

薛同孫

失其字官宣教郎所著甬東野人語四卷

獨坐

獨坐蓬窻雨炊烟出竹新
病愁思謝客盜賊敢驚人
白首開新社青山列舊隣
不知江海上猶有未清塵

樓生攜酒過新莊田舍

寂寞江村路何煩命駕過求羊忘地遠松竹到門多野
外常無酒田間別有歌洗杯深酌處落日在滄波

薛知縣觀

一名燾字景旬一字處靜少讀書強記為詩文多不
具草至治癸亥舉於鄉官沅江主簿有治名引年授
知丹陽縣致仕所著有學箕集三卷

曹娥江候渡

曲曲曹娥水山高日欲晡到江行李亂隔岸渡船孤樹

黑收嵐靄沙寒集雁鳬荒荒誰氏子不及釣魚徒

門人江漢縣齋夜集

縣裏經行日桃花遠近村師生一夕誼治亂百年論吊
古投燕壁看邊出薊門天涯游宦迹離索仗君存

教諭鄭先生覺民

字以道蒙隱先生子也積學篤行與程畏齋齊名其
所學自經史傳記下及百氏之言無不究覽學者翕
然尊之郡守王元恭將行鄉飲酒禮先生為酌定禮

儀隣郡取以為法性至孝母常患目日以舌舐之即
愈復病癖侍朝夕不敢解帶既定日墓父適病瘖甚
人謂不宜臨壙先生泣曰幸從先人訖大事即道死
不憾返而差以薦為龍游教諭三月即謝歸詔徵遺
逸授處州教授適疾卒有求我齋集三十三卷

送王叔載教諭象山

名厚孫深寧尚書之孫
也博洽與以道齊名

蓋壤邈今古義娥明旦夜動靜既有殊顯晦亦相謝奚
為至多物好惡迷取舍離方乃遯圓取密或遺罅安得

天下士定論萬物價

恭惟尚書公道輝燭乾坤望古浩千萬撫拾恣咀吞坐
值時運移閉門守深根春陽熙九寓英曜日盛蕃後學
競奔走衆屬此文孫

明州稱多賢文獻聚如積須臾見海桑晨漢星歷歷戾
契徒自強脂韋竟何益毋寧念本始述祖承典則邈哉
彼高棲俯瞰無丈尺

迢迢明月夜灝灝長風晨晤語一握手四空閒無人作

者不並世哀歌淚霑巾豈徒彼善之益懼大亂真撫背出門去川水日云云

象山海中居象泉何冽清泉以鑒妍醜山以見虧盈相望五十年羔雁各逢迎送別固有禮怡悅尤多情春深照花溪爛爛雲物晴

蔣訓導宗簡

字敬之少有才名初從天台應伯璋受經及程畏齋歸里復執弟子禮居門下數年盡傳其學嘗一試有

司罷歸輒棄去勵志古學與其友王叔載鄭以道日以文義相賞析人笑謂蔣君壯年乃希學古文詞徒自詭何益敬之笑曰使吾義明氣充於發策決科何有得不得命也文有古今之異耶乃益杜門自勵嘗再為郡學訓導有師法翰林待制柳公貫見其文驚異方論薦於朝會卒年三十一人以顏子方之

送徐使君入覲效古

徐君用宏以進士為鄞縣丞

徐侯鉛山來德性真希差

去聲

蒼頭及白鶴塵尾而犀把

郊原父老歡道里兒童迂或道今卓茂相期古黃霸憶
昔隱韋布已自紛誇詫朝歌擊竹枝夜讀燒松樺學問
窮奧安文章整間架驤裒終獲售娉婷必宜嫁何有孔
鸞羞孰作啁河嚇當夫一鼓行但覺諸人罷豈知金僕
姑乃妙參連射得雋快哉還兇螯暫時卸主人甚見嘉
恩光乃相借令侯出丞鄞侯拜于陛下三年秉貞心百
里弘元化山島樂烏鳶野田豐穰稔纖草隱於菟翠竹
眠香麝樵唱歸錄遲社酒盈缸醉致此有自來我侯每

閒暇盤登置馬甲
餌釘紛蝦蛇
呶呶小垂手
艷艷白玉竿
胡為又及瓜
使我失噉蔗
青梅結子初
黃柳飛花乍
銀鞍當時披白馬
庭前駕上馬
別長官亦復謝僚亞
公孫本牧豕
范睢出拉豁
此等不足慕
高材還善價
願將五色石
上升補天罅

右效韓退之

銀海照光空欲滴
偃月伏犀生腦額
徐侯不是尋常人
異日金章凍梨色
白魚歷歷枯芸香
翠雲暗結方花箱
手將白玉書細字
珊瑚碧樹枝
交相古燕上
界仙人府

翠駁銀蹄踏烟霧殿中曾見堆飛來插花笑對仙人語
海風栗栗句章邑老蛟飛舞神鼉立我侯擊劍生銅聲
三尺妖狐望山泣古堤柳花噴香雪雀啄花行看人別
侯今去去不可留青鸞遠破春雲熱

右效李
長吉

鄮山袁先生士元

字彥章德祐忠臣鏞之孫也性至孝父澤民嘗患背
疽先生吮之立愈少嗜學講誦至廢寢食既長益沉
博以御史薦授本縣學教諭調鄮山書院長危素薦

為翰林國史院檢閱官力引年不赴晚年築城西別墅種菊數百本自號菊村學者所著書林外集七卷

和大章雪裏送詩

山翁卧雪寒且飢敲門有客來送詩詩中一字煮不得妻兒爭怒吾獨竒閒粘素壁時一見恍若此老來茅茨洛陽賢令久難覲剡溪故人多別離寒牕得此真自慰絕勝贈我珠與璣呼童索筆追和欲走謝天陰地遠出入愁無驢

題慈隱菴

高僧以慈隱遠在石橋西地接支郎寺門臨孝子谿松
陰斜落徑竹影亂侵畦不見中岩老荒村獨杖藜

和松石齋寒食客中

王孫歸未得芳草接平蕪邊報不時有鄉書絕跡無馬
憐橋外洗猿憶洞中呼客底又寒食故園天一隅

編脩馬易之

本郭羅洛氏譯言馬也名迺賢以字行世居唐回鶻

部後為南陽人至易之兄塔海仲良始登進士易之
少篤學志尚高潔不屑作制舉文字尤長于詩力能
追步古人嘗持其行卷謁貢御史曰此心泊然無他
好所好而得之者盡在是矣其標格若此既從兄宦
游江浙間吾鄉鄭以道先生師法甚嚴乃齋糧從游
門下得傳其學遂卜居於鄞已復與會稽韓與玉金
華王子充同至京師與玉能書子充善古文易之以
詩名時稱為江南三絕而易之詩名尤重每作一篇

即傳誦士大夫間久之歸鄞聘為東湖書院山長以薦授翰林編脩出參僧格實哩軍卒于官

余嘗讀金臺集輒歎易之產自金臺數萬里外身獨以詩名既雅慕四明山水家于吾鄉其詩遂日工誠崛起異人也既而讀鄭以道先生集有贈門人馬易之二序黃潛宇文公諒書其後謂四明鄭先生所贈弟子序以規不以譽師道足重而易之持其師說徧示諸賢士大夫意在不負所教始知易之詩法有深

得于鄭先生者也宜僅四明山川之助哉

劉黃祠

入郭日已暝慘淡楓葉赤鞠躬荒祠下低徊想遺直劉
君素忠憤伏闕論邦國痛陳腹心禍竟罹考功斥餘子
盡騫騰鬱鬱負慙色鄉人仰高誼千載崇廟食悲歌風
蕭蕭感慨情惻惻出門無行人涼月照東壁

居庸關

疊嶂綠青冥峭絕兩崖束盤盤龍虎踞岑巘互迴伏重

關設天險王氣與坤軸皇靈廣覆被四海同軌躅至今
豪俠人危眈屢驚縮崎嶇棧閣峻縈紆岡澗曲環村列
虛市鑿翠構廬屋溪春激岩溜山田襍稌菽絕頂得幽
勝人烟稍聯屬浮圖壓廣路臺殿出層麓白雲隱踈鐘
落日帶喬木豈須歎蜀道政可夸函谷居人遠念我叩
馬苦留宿恐辜殷勤情解鞍看山瀑

李老谷

谷中多
杜鵑

高秋遠行邁入谷雲氣暝稍稍微雨來漸怯衣裳冷縈

紆青崦窄杳窈烟林迴峯迴稍開豁夕陽散微影霜葉
落清澗寒花媚秋嶺途窮見土屋人烟襍虛井平生愛
山癖悵此愜幽靜月落聞子規懷歸心耿耿

檐子窪

朝發牛羣頭夕憩檐子窪高秋得清曠野蔓多幽花黃
雲翳日脚草色浮天涯山荒樹寂寞寒陂落昏雅頗喜
盜賊平塞田盡禾麻至今將軍壘日落聞清笳我生久
羈旅崎嶇涉風沙天寒道路遠曛黑投山家

羽林行

羽林將軍年十五盤螭玉帶縣金虎黃鷹白犬朝出游
翠管銀箏夜歌舞珠衣繡帽花滿身鳴騶斧鉞驚路人
東園擊毬誇意氣西街走馬揚飛塵湖南昨夜羽書急
詔趣將軍遠迎敵寶刀繡澀金甲寒馬上彷徨苦無力
美人牽衣哭向天將軍執別淚如泉安得天河洗兵甲
坐令瀚海無塵烟君不見關西老將多戰謀數竒白髮
不封侯據鞍矍鑠尚可用誰憐射虎南山頭

北邙山歌

白樂天賜第履道坊既塋北邙勅命
游人至墳所者必酌酒至今墓前陳

地泥
潦

北邙山高雲嵯峨山前日日聞挽歌千金買穴望卿相
不道洛陽人塋多長安歸來錦衣客昨日城南起新宅
雕欄華礎滿前楹盡是當年墓邊石墓邊野老鬢如絲
自言曾見築墳時轉頭石馬卧荆棘白楊蕭颯秋風悲
白日西流水東逝眼見君家塋三世舊時隧道盡為田
新墳苦作千年計寄語洛陽諸少年對酒莫惜黃金錢

縱有穹碑勛業文章誇靡誰能傳君不見履道坊中
白太傅留客高堂醉歌舞至今三月看花人載酒去澆
墳上土

劉舍人桃花馬歌

青絲駿馬桃花色翠鞍玉轡黃金勒奚奴牽出不敢騎
道上行人爭愛惜往時曾遇李將軍汗流赤血氣如雲
朝刷黃河暮南粵沙場百戰成奇勛歸來無心伏槽櫪
頓轡長鳴思奮力東家白面繡衣郎千金買去游南陌

昨朝校獵向南隅，萬人爭說天下無。
夜歸不怕灞陵尉，玉鞭醉打蒼頭奴。
畫燭銀屏歡徹曙，一朝金盡賓朋去。
可憐驕馬屬誰家，斷韁猶繫階前樹。
君不見西家款段三十年，青窠滿櫪菽滿田。
老翁不識城下路，騎看射獵南山邊。

贈空谷山人徐君歸武當

五更鐘鳴天未曙，六街馬蹄聲如雨。
露華滿屨霜滿衣，束帶爭趨丞相府。
千鍾之祿萬戶侯，幾人空負平生愁。

鏡中綠髮漸垂素窻間白日如奔流誰念幽人在空谷
癭木為冠草為服小壺春風紫朮香長鏡落日黃精熟
行歌偶到黃金臺坐看世事如浮埃長衢甲第換新主
舊時燕子愁歸來忽憶紫霄峯下路倒跨青鸞獨歸去
松華釀酒一千石結廬招我南山住

田家留客圖為四明劉師向先生賦

客來田家當六月主人相留樹邊歇呼兒牽馬飲清泉
廚裏新漿解君熱郎君出城幾日前城中米價今幾錢

昨夜南村三尺雨不知還到城壕邊勿厭儂家茅屋小
棘門新編土牆繞來朝蚤飯莫匆匆雞鳴送君出官道
送王公子歸揚州

玉雪王公子歸鞍向竹西水清淮白上天濶海青低瓊
樹春前發烏絲醉後題何須問勛業名與爾翁齊

送楊復古之遼陽學正

八月松亭萬木空著鞭又向黑河東穹廬頓宿供羊胛
部落晨炊爨馬通行看築臺招郭隗豈教執戟老揚雄

門生衣袂多狐貉來聽談經絳帳中

次段吉甫助教春日懷江南韻

華底開尊待月圓羅衫半滾酒痕鮮
一年湖上春如夢二月江南水似天
脩禊每懷王逸少聽歌却憶李龜年
卜隣擬住吳山下楊柳橋邊艤畫船

羅稚川山水圖十韻為甬東應可立題

平生丘壑趣偶向畫中傳雨氣千峯外
江流落日邊蘼蕪青滿渚芳樹綠參天
渺渺溪雲淨娟娟石溜縣崖顛

何處閣谷口小家烟漁唱來秋浦僧鐘落夜船瞥驚飛
鳥過疑有蟄龍眠竹徑能留客桃源竟得仙丹青跨絕
代賦咏藉名賢千古滄洲意含情憶稚川

次韻趙祭酒城東宴集

碧草纖纖藉翠茵醑釀釀熟十分春移尊更近池邊樹
漉酒先生待挂巾

十騎聯鑣入郭遲從教斜日過棠梨候門稚子牽衣笑

今日先生有好詩

國子監散學候日
影到堂後梨樹

薛提舉明道

失其字官至提舉有瑞堂藁七卷

浮淮

千里風催櫂三春客度淮
却憐鄉國異祇與僕夫偕
邇
豈防河貴魚應入饌佳
不堪舒病目杼軸轉傷懷

挂席

挂席春風任我之鬢毛
雖白氣猶竒欲將碧落
開成路
遂取黃河瀉作辭槎到
漢津須幾日桴乘滄海
竟何時

鷺身本有高飛具也立汀洲有所思

竹隱

風日蕭然掩華門竹深幾輩長兒孫間中拾籜冠堪製
寬處行根筍易繁解帶水邊棲綠影科頭林下倒清尊
為園自喜初衣遂遮斷塵情不用論

徐處士本原

失其字本奉化人後徙家於鄞隱居不仕與陳子翬
高壘鄭奕夫諸君相倡和所著有思剡集

隱學寺

訪古叩禪關招提盡日間
烏啼青嶂裏僧語翠微間
今日棲真地前朝隱學山
石壇芳草碧墓道落花殷
德洽民心服身罹國步艱
代周知遜位命楚反羞顏
鳳去彭城路龍潛越水灣
惟留翁仲在不見令威還
碑蘚應難認烟蘿已倦攀
隴雲同杳杳澗水自潺潺
暝合千峯紫香殘一徑斑
夕陽歸興緩清磬隔塵寰

文質

字學古為詩學長吉體客于婁江與楊鐵崖顧仲英
諸賢相倡和

和韻奉寄顧仲瑛二首

我愛虎頭公子賢高懷歷歷瀉長川酒尊花底分秋露
茶竈竹間生白烟日落漁莊聽雨坐風微草閣看雲眠
西涼進士曾留別應說相逢十日前

玉山之堂風日好高居共喜值清時紫簫曲度頻行酒
綵扇分題即賦詩溪樹積陰疑雨過水花留影若雲移

白頭有約漁磯上我亦歸來釣釣絲

甬上耆舊詩卷三

欽定四庫全書

甬上耆舊詩卷四

監察御史胡文學編

吾鄉自南宋詩人篇什散失其後而此道益蕪矣至
洪建以來薦紳則有鄭教授而下九人布衣則有至
孝李先生而下六人及章宋五先生後先崛起倡雅
此鄉于是翳霧漸開蓼棘斯闢後來大家蔚然盡出
矣天作斯文諸公荒之于俎豆安可忘也今錄其遺

詩合為一卷至所稱章宋五先生見者舊初集中

教授鄭先生真

字千之別號滎陽外史父以道先生見前傳先生少承家學通諸經尤長于春秋他研博極古今吳草廬先生嘗發策十二事對者十不得一先生年甚少為盡荅之由是有重名中浙江鄉試第一授臨淮教諭值晉王之國過臨淮王聞先生名延說春秋先生為開陳大義王大喜稱為鄭先生秩滿入京賜燕命賦

菊綻西風露脂楓葉詩稱旨陞廣信教授以引年歸
里先生嘗取諸家格言著為集傳集說集論復採撫
鄉先生言行文章撰四明文獻錄後學稱之初國子
典簿裴中嘗請先生作著存堂記亦求潛溪宋學士
文潛溪見先生記歎曰君徒羨我名使我執筆不能
過之後數年裴復與潛溪言潛溪曰前見鄭先生記
發明洞徹使之獨步可也其為宿老推重若此

公無渡河

公無渡河公竟渡河吁嗟奈公何長風掀天濤浪急蛟
龍垂涎待人食公乎渡河甘墜溺慟哭河水湄公乎不
返將安之憶妾嫁公時窀穸矢同歸如何中道乖百年
負深期河流湯湯猝未乾妾欲見公良已難嗚呼命兮
公所安公所安吾誰冤愁來只取箜篌彈商聲淒切淚
橫臆化身欲填精衛石河伯深宮閤勿聞公乎渡河嗟
莫及中心惻惻思惻惻請公來聽箜篌音相從願向重
淵深公乎公乎知妾心

搖搖花

虞美人
草也

搖搖花花開向天涯
花搖搖花如金步嬌
憶昔美年正少青春
共覩花容貌金釵聘
入楚王宮嫣然一笑
顰脂紅獨夫叱咤空
四海恩寵惟憐一身
在戲馬臺前宮闕深
當筵歌舞娛君心君
心漸荒霸氣銷淮南
却望烏江遙漢兵十
萬紛于螳帳底美人
淚如水八千軍散楚
聲中獨身請為君王
死陰陵古道行人來
傾城之色真堪哀金
釵霜飛猩暈落天魂
化作春花開花開花
謝何

曾改春秋浩蕩愁如海愁如海將奈何
虞姬墓前春艸多花靈寂莫欲歸去
杜宇夜啼三月暮

平陵東

漢東郡太守
翟公門人作

平陵東翟義死東海翻波冤莫洗
新室已成漢室已傾一朝北面誰為臣
噫乎大義甘殺身挽槍光芒射天闕
立髮萬指劒雙折碧艸叢叢一泓血
漢家神靈杳空濛欲排閭闔訴
難聰吁嗟平陵東奚獨死義公

龍舟戲水曲

千里晴波汴河鑿萬丈虹橋依樓閣龍船錦纜駕風來
五色騰驤駭鯨鰐河伯深宮執玉朝鮫人震懾停織綃
三千粉黛出歌舞星裙霞帔風飄飄大業官家擁鑾輅
香爇沉檀藹烟霧吹簫擊鼓向中流倚空笑指江都路
瓊花三月春晝閒高臺照鏡憐空顏回首長安歸不得
風濤洶湧愁人間君不見昨日燕都誇海子五爪盤拏
綵雲起天魔舞罷翠華奔高柳斜陽映秋水

送胡廷幹歸松江

謫鄉壘畝慰幽栖物外游塵不上衣自有阮生青眼顧
也如江總黑頭歸秋風東海尊鱸熟晚日西園柿栗肥
自此不須談作客白鷗應許共忘機

寄烏繼善先生

紅心驛外望家山颯颯西園兩鬢斑繫雁書成霜滿地
飯牛歌罷月臨關漫傳海外蘇仙死終許羌村杜老還
客舍不知身健否何時訪我白雲間

題五河安淮驛遠碧亭

淮山遠送一螺青悄悄雲烟入杳冥檐外竹風醒鶴夢
坐中花雨雜龍腥佩聲襍還天仙下蘧韻咿鳴水若聽
使者船稀官事少石牀孤坐夜觀星

寒夜絕句簡丹徒縣丞

竹屋寒燒搢拙烟先生高卧腹便便淮南為問江南客
何似山中夜雪天

司稅薛先生敬

字原禮宋進士朋龜九世孫也博學有重名至正中

嘗典教象山隨謝歸以行藥自晦時稱退菴先生洪
武初舉茂才授龍泉司稅即引年致仕先生詩淡樸
之中更饒高韻所著江天集子孫傳其業世有作者

元日望闕叩頭作

青帝更時序郊園泰運開
親親明主賜經國大臣才
晴色人都喜貧家客不來
恩寬唯海似延首望蓬萊

與范宣之何約之重遊隱學寺

薄言山寺去兩度出東郊
湖草添新漲山禽改舊巢
烟

霞墊衲路鹿豕故人交鐘磬雲深處來聽幾夜鼓

秋夜江上作

舟次大江干推蓬水氣寒鴈從今夜度月似故鄉看客
久逢衣破家貧得祿安悞人頭白早猶是進賢冠

客以重陽無酒詩見投戲答和韻

塾館蕭然掩暮鴉幸將愁思破隣家不知誰有登臨地
却怪君看寂寞花京國歲時淹海客江村風雨夢天涯
何妨明日觴重舉屋後秋園萬樹霞

小窓梅花初放見之而喜

茫茫凍色暗江天
忽見春歸古樹邊
素質獨教高士賞
幽香不藉世人憐
放來薄帶山窓雨
看去輕霑水國烟
何必羅浮千萬樹
儘堪對酒送殘年

題高士圖

烟柳垂垂壓艸亭
千峰樹杪向人青
是誰高坐飛泉下
木榻翛然似管寧

叅政王公敬中

字子同初中吳伯宗榜進士甲乙科並為吾鄉舉首
歷官叅政子同有詩名遺艸失傳今所存七律三首
亦略見音格云

送友人赴廉州

烏府才華羨獨賢北風又上孝廉船
篋書尚有陳琳檄行李都無子敬氊
帆影曉分湘浦月珮聲晴拂隱山烟
壯游萬里須乘興好著聲名到日邊

贈周玄初尊師

玄都道士身如鶴長傍青松寄此生夢破九霄風雨急
神遊八表雪霜清吹笙每應秋聲起披羽微連夜色明
我欲相從拾瑤草漫山落葉斷人行

南湖齋居寄友人

山寒夜透青綾被海日朝明白玉珂隱几不知春色晚
停杯驚見落花多旃檀香裏來僧梵楊柳橋邊起棹歌
咫尺湖光不相見竹床琴調近如何

紀善錢公安

字靜能以字行少有詩名辟授臨安訓導遷韓府紀
善王深相敬禮嘗召見其子手書具慶堂三字賜之
永樂改元聞公名召至京師將大用之公義有不可
固以老辭得放還且賜敕曰遂爾優游勸鄉子弟為
善亦異數也公既家居日以觴詠為事所著有畦東
集老卒于家公遠孫廉嘗輯公遺詩屬余序之有曰
當靖難初方以刀鎗鼎鑊處士大夫不屈者公諸藩
舊臣義堪去就而能從容乞身不撓不亢以視劉程

二長史周紀善或死或去其仁一也蓋錢氏世門實
啟于此

紀善詩健樸有蒼然之色其佳句如發車廐驛曰寒
輕初試酒風好不停撓朝天宮習儀曰火存千歲藥
雲擁萬年松三塔堰曰野田低接渚春嶂遠連空過
佛壠曰花嶼雨晴椒實麗竹居風煖藥苗肥遠眺曰
巖樹有情憐我老溪雲無意逐人流贈陸柳州曰當
世人倫歸月旦故鄉父老問寒溫東方彥修曰粗有

田園須養犢更無筋力可乘驂人至今稱之

舟中遣懷

朝發浙江頭暮宿越城下寒月炤船窓清霜肅原野豈
不念別離吾道有用舍衰蘭在中洲採之不盈把方春
桃李花紛紛爭豔冶俛仰宇宙間孤懷浩難寫強取囊
中琴起彈仍復罷悠悠世上人誰是知心者

泊梁湖堰

曹娥廟前雲霧積曹娥江上風雨急停舟五日猶未行

舉頭問娥磨不得憶年十八初度江昨日年少今頭白
開篷忽見江上山山色仍如舊時碧我思今日山中人
地爐竹火齊促膝山中我亦有敝廬嗟我胡為遠行役
讀書求名乃身累辛勤用盡三冬力微祿何曾得養親
到今負米公家喫憂來正擁布被眠破篷漏滴船中濕
岸上敲門借酒家瑟瑟寒風吹四壁夜長展轉不成寐
但是思家便沾臆來遲又恐長官嗔西望吳山日東出

楓橋感興

野水添新雨春帆帶遠暉君誠不世出臣得及時歸大
甕開陳釀高堂著贈衣入關鄉路熟夢繞故山飛

喜晴

秋風忽起捲重陰日色微茫樹林埜老扶藜看白石
山人伐木度青岑門前溪水深三尺墻外竹梢高十尋
明日甕頭新酒熟且依松下一開襟

紹興

越王臺下憶曾游舊褐頻經易白頭上國盛時叨侍從

老年今日許歸休
魚供春版橋邊飯
鳧逐晴川柳畔舟
私喜季真千載後
鑑湖猶得接風流

紀善薛公服耘

字濟美舉于鄉
歷官趙府紀善
所著曳裾錄十卷
濟善集三卷

洛陽上巳篇示座上酒客

羽觴浮曲水
景物麗中天
繁花紅炤面
弱柳碧拖烟
繁花弱柳東風裡
一年一度何時已
惟有北邙青春深黃

鶯喚人人不起誰家年少玉勒輕朝朝來往洛陽城日出河邊修禊罷日斜陌上鬪雞羸楚漢雌雄亦如此徒使人間留上巳請將笑口向春開不到沉酣不知止

渡渚沱

欲覽千秋跡因為萬里游水從昔人合水似往時流北土寒應厲東風急亦柔幾回陵谷改不去有沙鷗

延慶寺夜坐

几淨僧燒燭床空客解衣披心各不倦快意竟忘歸夜

雨涼松舍秋蟲慘竹扉十年寥落久已與世情違

送上郡太守徐子開赴任

士林聲價舊峩峩風采初看似太阿月裏蓮花經華嶽
天邊柳色渡黃河雙旌去日中原擁五袴他時上郡歌
願以農耕易鋒鏑使君卧閣意如何

望銅雀臺

舞罷歌殘人不來遙看漳水浸層臺昔時上食今能否
何處埋身未許開夜靜月明聞急管秋深露白見荒苔

河邊芳樹年年綠空使高情想鄴才

立秋日作

高樓獨倚思何窮涼雨西來萬點風不覺三時遷病裏
復驚一葉落愁中早年涉世游方倦即日歸田貌已翁
更恐秋聲容易至明朝聞杵又聞蟲

按察使謝先生瑾

字廷蘭本蜀人徙家于鄴為人魁岸性倜儻嗜學以
進士出使粵中經庾嶺見大木委道傍因作悼木賦

以見志尚書夏公原吉覽而奇之薦于朝授刑部員外郎遷郎中持法平出知平陽府平陽俗尚武悍先生戒其屬吏曰治民在順其常性而已能順之則俗不擾而易安由是所部帖然尋丁外艱方治歸部民俱走闕下請留上特報可秩滿遷廣西按察使數辨冤獄軍吏俱畏服之年五十七卒于官先生所在奏治行第一尤以詩文擅名所著蝸濡集行世

郡守沈鳳峯先生愷序吾鄉詩曰四明詩源起自唐

賀秘監當時已與李杜並馳循至宋元攻尚互異篇
什不傳及洪建以來作者輩出倡雅中朝則有鄭千
之繼以張白齋金本清楊文懿諸賢後先凌競彬彬
以興先輩戴南江序曰四明詩人萌芽秦漢鳴盛于
開元宋元而下其詩失傳至洪建中吾鄉詩學始盛
盡歸雅馴嘗得名家數十人若謝廷蘭章文重金本
清張白齋魏雲松其傑然者風雅之體于是為脩余
按兩家所述吾鄉詩源一以鄭千之為舉首一以謝

廷蘭為舉首鄭先生家學淵源蔚然作者余已選其
全集錄冠此卷及讀謝先生傳意其負才氣歷落自
許詞賦流傳為當代巨公所重而諸選家僅錄詩一
首意殊不滿迨始從范氏天一閣得讀其蝸濡集于
腐題爛句中時作驚人語老氣橫厲方稱其人若非
先輩藏書則風流盡矣余既錄其七言七首他若吉
州曰亂山過雨迷高下斜路穿雲入有無秋雲曰晨
度空林迷馬鬣晚拖疎雨帶龍腥樵唱曰數聲去疾

雲生屨一曲歸遲月在薪金山寺曰月轉天心山壓
卯塔橫燈影水吞虹沙浦曰青裙移擢脚雙赤金鯉
出波鱗半紅幽居曰新聲歌罷春生榻老瓦盆乾月
滿樓並奇句也

金山寺

潮汐難磨萬古塵老龍無地斲浮根戴鼇水弱低三島
補石天開露一痕浪湧兔沈瓜步月雨腥蛟送秣陵雲
時聽梵刹傳僧唄栢子香飄半塔熏

長淮

千里淮流勢若奔
咆哮西下地平吞
天吳激浪來江口
鬼伯推潮出海門
疎雨數聲雲入浦
遠林一抹水連村
汴流有客登瀛去
路入青河日又曛

梧江

漁家生計少經營
暖飽時供不慕名
撒網唱歌郎首白
鳴榔和曲婦裙青
鷓鴣小雨灘頭夢
鷗鷺輕風世外情
行客獨為車馬累
重聽蠻唱有餘聲

汾西縣

幾家荒冢伴荆榛半里孤城帶夕曛穿穴作廬人類鼠
鑿山供爨石為薪雞豚醉樂村祠社桃杏紅香客夢春
最是農夫耕絕頂一犁穀鯁入寒雲

歸牧

石橋流水月娟娟自放紅林不記年六七里村黃犢雨
兩三牧豎綠莎烟秋雲半濕衣垂盪埜曲橫吹笛在肩
鬱鬱墓門遙指處可還重上一丘眠

羅江神祠

土祠祈福慶年豐歌嘯巫陽薦祀同一奠神惟迎社日
半竿旗不飽靈風雞豚頌裡爐烟碧簫鼓聲中燭影紅
拜祝此時須應感莫嫌門徑有苔封

黃陵廟

黃陵帝子泣嬪虞絃斷南薰鳳影孤紅盡淚痕傳翠竹
青來魂氣隔蒼梧秋風衡岳沉鴻鴈暮雨湘江怨鷓鴣
明月三千年後夜九疑雲冷夢應無

按察僉事黃先生潤玉

字孟清五歲侍母病夜不敢就寢六歲讀書所覽輒成誦坐立屹然未嘗與羣兒伍十歲行道上見遺金不拾年十二聞太守王公璉行鄉飲酒禮造學中觀之因默識其儀歸書于冊人見所記大奇之永樂改元詔徙江南閭右實北京父當行先生年十三傷父老行萬里詣官涕泣請代官謂其少先生曰父去日益老兒去日益長官善所對許之行踰年至京受廩

都城外十里沙漠寒冱無人烟先生與同役築室成
比間墾圃粥蔬以為生兼應徭賦人不堪其瘁先生
安之稍隙輒肆力于學北方無良師友先生以心為
師以古聖賢為模楷擇然後言確守不可易都中有
富人與一女居招先生寓其家同賈先生辭不往或
問之先生曰古人不處嫌疑間此即是也里中高其
篤行多使子弟從之因毀其學舉于鄉官南昌教授
用薦拜交趾道御史奏彈權貴無所顧出按湖廣斥

藩臬郡縣不職者至百二十人俱解綬去威名赫然
用少師楊公士奇薦遷廣西提學僉事力屏浮薄篤
士風時值寇起用兵都指揮吳某橫掠子女萬餘口
劾而歸之副使李立入民罪數百人力為辨出南丹
衛在萬山中瘴甚戍卒歲半死為奏徙平野凡先生
所施行萬口交誦調湖廣僉事持憲益嚴巡撫都御
史李實張甚藩臬俱曲事之先生獨無加禮更黜墨
吏二人俱其所私也實大怒劾之降知含山縣盡除

諸宿弊閱蘆塲重浚麻湖復所逋租與民均徭平訟
民大悅竟引年致仕先生好學自少至老未嘗懈其
言曰明理只在讀書制行惟當慎獨性剛介寡交所
稱許四方名士若李文毅公時勉薛文清公瑄不過
數人與客言惟講道論文不少及時事歸居東臬草
堂閉門簡出日研索經義謂聖學莫先于五禮因取
儀禮析為四卷以禮記比類附之其不類者載諸卷
首末各有意義又以軍禮獨闕取周官大田禮補之

及禮記載田事者別作一卷通為箋釋曰儀禮戴記
附註復考定深衣袞服古制補諸經四書註撰寧波
簡要志四明文獻錄雜註道德陰符二經因安遠侯
柳溥從問古兵法更為孫子註其他備論理事曰南
山錄詩文曰南山藁里居二十年壽八十有九卒子
隆歷官副使是為南谷先生別有傳孫溥字存吾官
蕪湖訓導纂續大父所著書是為南厓先生曾孫吳
字啟亨歷官知岳州府有治行四世俱為名臣

祭酒頤菴先生寄讀杜詩一章因奉和

先生觀杜詩洞曉其中趣顧茲藜藿腸焉識菽粟味乾
坤初未交風雲本難際自匪假聲詩烏能吐忠義高歌
動千言曲庇非一類區區稷契心綽綽廊廟器胡為月
下烏却遶風前樹魚龍方混爭鴻雁若相避雖致杜鵑
詞曷駮野狐媚間關蜀道行悽惻巫峽淚纍然喪家屨
困若伏檻驥康衢本平夷大雅惜顛墜斯文既云亡吾
道安所寄浩浩三百篇寥寥千萬世惟公得其傳作者

奚足繼公詩天寶間落日山橫翠

詠牛

落日散郊野牯犝分後先春風忽相尾老鼻時一掀物
情妙造化蠕動無不然傷哉怨曠者世道何其偏

奉和頤菴先生秋興

秋宵羣動息風景有餘清暗露梧邊墮流泉竹下鳴興
來忘宿疾詩就總閒情此際衿如洗憂思何處生

自歎

白髮釀衰容那堪氣不充眼花時見燐耳聾日聞蛩忽
忽如醒夢行行似踏空達人雖識早爭奈太龍鍾

書所見

楚郊閒縱目城郭見應稀雲過峯掀帽苔荒石褪衣燕
穿沙岸蟄鷹亂燒烟飛景物尋常裏誰能悟化機

山路遇雨

萬里南行愧不才旅懷那得暫時開青天夾路重重去
白雨傾盆陣陣來油傘紙穿連我濕竹甕泥滑怕人搗

悠悠世味都看徹
惟有心期未肯灰

入松行

心謁衡宮久已齋
天靈為我掃陰霾
傾翻穀節三朝雨
洗淨松行廿里街
更喜沙堤緣白石
何妨布襪曳青鞋
行行看到南峯頂
一蕩胸中萬古懷

和大理卿蔡公錫採蓮舟

梭拋葉泛不辭頻
界破西湖十里春
蘭漿魚浮微借力
箬篷鼈覆半遮身
折荷作蓋還尋藕
製芰為衣肯厭蘋

日莫歌聲歸一路路人只看採蓮人

冬夜地爐剝栗飲酒

周圍盡把紙窓糊六角攢磚作地爐拾得樹錐乾似脯
埋來灰火爇如酥連糟頓煖茅柴酒帶殼煨開刺栗蒲
長夜老年渾不寐拚教一餉醉模糊

鄞城草堂

古鄞三面海通潮地局西來雉堞高日月兩湖環作島
坎離雙港抱成濠百花潭上渾如杜五柳門前總似陶

擬卜歸休寄長嘯草堂先自號東臬

薛亞卿耕樂卷

人間名利任紛紛
剩買田園遺子孫
春雨一犁閒犢
秋風數頃飽雞豚
條桑已喜蠶盈箔
釀秫何妨酒滿尊
了卻官租無个事
吏胥那得夜敲門

題畫

青山合勢水分流
溪上人家綠柳洲
路入溪橋人跡少
扁舟常自繫槎頭

題家藏山水畫

風雪初冬致政還一童一騎到家山
短藜力弱土橋滑
老我放歌行路難

御史董公琳

字廷瑞號木石以進士除南京監察御史時戶刑兵
工四部尚書國子祭酒俱不職公抗疏論之掌錦衣
都指揮劉敬父子怙勢橫虐言官為結舌公獨疏其
不法遂逮敬奪官子論戍一時風裁凜然出為山東

按察僉事在職勞瘁遂以疾請老卒于家子鑰亦為名御史見後傳從子鰲官戶科都給事中

余近選此集於諸世家遺文最所加意萬允誠更走訪不遺力一日余謂允誠曰城西董氏其先有父子名御史而里中諸詩選絕不及豈兩公俱無文辭耶復念董工部德鏞吾家壻也為公後因遣姪輩往從問其家頗有所藏先世遺集否次日董甥從舊篋中覓得一冊來前後剝落數紙喜中尚完好發視即工

部所刻先世兩御史集也詩各一卷數十首俱華健
有奇氣不媿作者余讀之嗟賞竟日若工部誠所謂
賢子孫也工部刻此集在崇禎癸未九月不及半年
國難作工部亦下世詩板俱毀今僅存一二冊即御
史子孫俱未得見若失此一時前輩風雅竟不可復
問矣余因簡與公同時若薛司稅敬紀善服耘詩則
從薛氏所刻世風錄之陳太守本深詩則吾友陳同
亮持示其家乘所抄副使張公曷詩亦得諸張氏家

乘中錢布政與詩則余為吾友錢稚廉序定其家集
選此數首董氏兩御史詩則得工部所刻本也前此
七公俱自二百年後始登作者之堂為桑梓增重夫
諸公久以名位顯聞于世家有遺文而諸選家草草
且絕無問之者何況布衣草野金石之聲不出蓬戶
更誰為發潛德之輝耶梨洲先生曰坐視先輩佳文
字埋沒是為忍人三復斯言能無感歎

秋日早行

露濕青鞵濕行行天大白山腰亂鳥聲樹頂紅日色豈
苗青以繁池景靜涵碧隔竹新雞啼村烟互如織涼風
欺薄衫寒入行人腋念彼風沙陸能無苦行役

漁翁小景

刺船岸脚秋雨惡蓑襍挂草笠撐筇漁翁歸去沙上頭
兩脚競僵帶泥縮寒林枯削落葉黃高山律峯江溟茫
烟深路黑若衝虎呼妻便留床頭缸

窮冬即事

昨夜雨斷風不歇就床吹却書燈滅欲寐未寐展轉間
厭聽簷樹聲獵獵嚙喇一響拍小窓莫是寒梅枝怪折
侵晨拭眼開破門忽自當門一山雪鯢鯢硤硤詩酒中
古來惟有昌黎翁孟郊張籍在何許我欲聯句誰能同
把杯手戰衣裳濕茅柴碎火難為烘漸縮如蝟不足惜
雙親半百無裘重

山中書事

分得禪宮雲半間下方難買上方閒窓經小雨桃花盡

徑帶餘春苔蘚斑奇篆出香薰古壁亂鐘催月過青山
山深盡日無人到坐卧看書門不關

咏菴前小塘

曉來狂雨過書堂山水分流半小塘柳葉倒垂青鑑影
揀花輕漾縠紋香夜寒蟲叫千聲月日暖魚翻一尺霜
忽看千山奔不住碧天高處瀉嵐光

出門

出自城闌遠望通澹烟晴色曉光融湖山似帶前宵雨

花柳猶存舊日風，但得常隨芒屨健。須教不放酒杯空，
憑高且縱山頭眼。一片人家澹靄中。

暮春即事

遠山雲出千重岫，流水聲歸半掩柴。我法于今輸我拙，
人情非古任人乖。午風柳絮輕飄雪，夜雨苔花斜上堦。
燒筍煮茶澆睡癖，青烟細細颺幽齋。

庭前晚步

一眉新月天西白，兩眼舊山溪上青。月白山青原自若，

金匱要略卷四
壯夫頭上已星星

訓導周先生序

字文彛號味墨有詩名以辟薦授本郡訓導詞家謂
先生詩氣體高妙在當時能超然自出

起夜來

迢迢中夜長明月流素光如何不能寐徘徊坐惆悵四
望間無人對影臨空牀忽聞孤雁征零淚沾衣裳涼風
亦蕭蕭露下疑為霜思君既不來玃玃守閨房

宮怨

羅幌動微風
沉沉永巷中
鳥啼朱戶掩
花謝玉蘭空
妾意春長在
君恩水自東
獨悲明月夜
歌吹動深宮

城西別墅荅諸友見訪

治生在菑畬
結廬向西陌
窮巷寂且深
荒磧被榛棘
晨興荷鋤倦
日入復歸息
常恐負所懷
黽勉在茲役
深感父老情
出門遠相索
觴酌忻時豐
即事良可惜
于焉罄交驩
既醉忘終夕

埜田行

萋萋芳草白楊路落日平原聚狐兔斷碑蝕土已無文
旁人言是將軍墓將軍未死竭忠良將軍既死多感傷
萬年千載一坏土石表仆地今荒涼子孫漸遠人莫識
亦有栽桑與栽麥雍門引琴為誰悲能不歎歎陳跡
月夜憶鄭維乾

門前湖水清坐愛月臨城月在不能寐水流空復情芳
蘭寒露重衰草候蟲鳴斷絕淒涼夜深慙夢未成

至孝李先生本

字孝謙父仕開操履嚴正里中比之王彥方生三子
長即先生次悌謙次忠謙當元末仕開杜門為子弟
擇賢師友不妄交游一時金華戴良永嘉高明豫章
揭伯防武林楊彛陸德暘慈湖胡舜咨諸先生俱以
齒德文章來游四明仕開為掃席館舍使諸子俱師
事之故李氏造學淵源最為有本先生甫十歲即能
綴文二弟俱明銳嗜學兄弟相友愛有事兄必先弟

而弟常代兄行父卧疾先生兄弟日更侍牀下父食
乃敢食父至斷食旬日亦飲水充腹而已終勿執筆
洪武初郡國例造戰艦吏以仕開饒財使任督既成
使者驗艦材不良坐法送秋官論獄先生甫弱冠請
代父囚曰父老我壯宜往悌謙甫十八已為人後亦
曰兄多疾且親所愛宜留我當往使者以為非情兩
繫之徐偵其兄弟終無易詞竟遣長者往先生至都
門輸作日涉冰雪負土石手足痠瘁流血經一歲得

赦免歸十年仕開又以富室主料量米耗罪當死忠
謙年十九即荷械詣官曰盜米者囚身當坐幸釋老
父官避其氣貌許之得免死黥而戍竟死遼東仕開
卒先生執喪盡禮守令重生先生相繼論薦固辭不出
郡博士鄭深道常造其家先生閉門不見深道曰所
以來求一識先生耳非有它也乃出與語甚驩深道
為止宿去會詔天下纂修圖志太守汪旭起先生總
裁郡乘書成而卒後七年悌謙亦卒先生宿有隱德

隣人寢疾晨候之密以錢十緡置席下去繞宅種竹
夜遇人盜笋縱之去次夕為采笋置籬外其行事多
類此嘗憫郡中文獻失徵因撰四明文獻錄四明先
賢記學者宗之他所著有經書問難通鑑攷証急就
章注長律英華藁中林集諸書

蟲言

翁翁復翁翁汝儔誰與同此翁不解世間事世間賤老
少為貴恨不鑷白還蒼童何用自口稱翁翁

蜂

遮了遮了主人破屋忙不補只愁秋來長苦雨南岡黃
茅亦易求何不剪取遮牀頭城中盡是樓上樓誰念中
宵沾濕愁

蟬

題畫

青天際遠水落日明遙岑奮袖拂蒼石憇此長松陰涼
飈洒露頂正可絃吾琴古調詎自秘坐惜無知音美人
隔秋水望望烟波深何當一相晤曠焉諧素心

踏雪犬歌

踏雪復踏雪汝身胡不純鑄鐵四蹄截肪行蹩蹩前年
雪壓溪南橋相隨看梅長尾搖足間銀杯凍不脫至今
未向春風消盡日荒村無客至月砌風林有時吠貧居
盜遠難為功好了當年黃耳事五郎戍遼今五年絨筒
應肯為我傳灤河十月水連川雪花平鋪如踏氍毹足
不假東萊船歸期盼爾春鴻前飽飼肉飯花陰眠

伐冰行

堪輿疑汜陽春蟄滕六飛花黑風急五更漏月添重霜

大澤腹堅三尺強六丁力奮寒似熱脚踏手搥齒欲嚙
范增玉斗付一揮滿奮屏風紛百裂水仙宮闕墮嵯峨
凍蛟如鱗寧敢呵驚將孝子雙魚出截斷將軍數騎過
剋圭敗壁瓦礫積轉壑奔崖金鐵劃雪宮爽意逼人寒
月窟晶光炤人白南江窅子平如坻年年千斯與萬斯
兩潮鮮船錦鱗活六月渴吻瓊漿滋吾聞開藏非細事
燮理調和寓深意獻羔祭韭並得脩沉李浮瓜盡霑賜
千年舊禮今失傳官家稅盡私家利

題柴昆陵越山春曉圖

君莫著謝公登山屐更莫問子猷泛雪舟請君試看高
堂壁彷彿李白天姥之神遊於越山川甲天下秦關蜀
道皆土苴柴侯晚年天機精酒酣潑墨為予寫天姥高
出東南天天台四明相蟬聯影落平湖一鑑淨正對賀
老山莊前近山青青遠山小烟霧溟濛漲春曉雲門日
出似聞鐘耶溪樹綠應啼鳥鳥啼不可聞林深不見雲
只疑空青四山合倏訝飛瀑雙崖奔極知妙手奪天造

真宰上訴天為悄獨脚山魃作鬼精偷向靈巖拾竒草
水竹江花何處灘漁郎翠縷露未乾青帘酒家石橋右
艤舟却憶姚江干長松之下一片石竹杖芒屨二三客
脫巾高挂白雲邊醉倚青天翠欲滴

送徐允迪還城中

寒梅照虛牖嚴霜凋敝裘故人動歸興歲宴不可留徐
卿立身何坦蕩行年五十猶偃仰不思唾手取公卿却
甘低頭在艸莽市中賣藥能逃名杖頭挑錢還解醒悲

來不作窮途哭時復有詩鳴不平忘年之交古來有臭味相同即為偶來遲去疾奈爾何無限離情付杯酒北風吹雨凝作花船頭鼓冰船尾划道傍行人指歸路城上栖烏還到家城市塵埃易更改還念山林青眼在看花有約明年來教我村童埽門待

孤雁篇

秋高八月風力狂吹斷長空征雁行分飛漢月去影隻叫入楚雲幽怨長獨夜愁迷荻浦雨五更夢斷蘆田霜

苦吻連朝不飲啄側身萬里遙相望相望萬里關塞隔
却憶平生長作客隨陽未飽稻梁謀遵渚常虞網羅厄
薊北江南三五羣秋涼春燠往來頻曾將捷書報邊使
更聯箏柱親佳人誰知中道兩相失漂泊天涯歸未得
開口敢出號天聲畏人且塌搏風翼錦衣鴛鴦相並栖
畫梁燕子雙將雛誰憐獨有孤飛雁歲歲江湖別離歎

送李溫內兄從軍

四月五月南風狂大麥小麥相亞黃吳蠶成繭不成繅

慈母又縫遊子裳遊子從軍上京國賣犢買刀助行色
西亭出租柳正長駿馬驕嘶羈不得丈夫弧矢志四方
豈效兒女戀故鄉酒酣慷慨拔劍舞青天白日飛秋霜
聖主開邊固無戰地盡西南置州縣獨憐殘寇喘息存
遠竄窮荒不知變君今名隸行伍中不用自誇兩石弓
胸中籌畫足制勝好居幃幄參元戎馬銜山前刁斗月
龍居河上旌旗風呼邪日逐爭內附凱歌入奏明光宮
從此朔南聲教同大開明堂議東封君則長揖辭成功

歸來聽我擊壤歌年豐

次沈克恭郊行

君家櫟社市一徑過橋斜
架束新收畵盆移舊種
花茶香留客語釀熟許人賒
佳句時能寄高情老未涯

送鬱林司征周仲班復任

便道還家暫解鞍
承恩南上敢辭難
七千嶺表重來路
十一關征舊任官
墟日鳥言夷出洞
秋天人面果登盤
料知公事多清暇
好覓仙翁句漏丹

山居為柯定安賦

四面青山障俗氛，數家雞犬自相聞。
茆檐低礙巖前石，木榻高栖雨後雲。
晚徑樵歸憑鹿引，秋林果熟與猿分。
從來懶入桃源市，自釀松花日半曛。

送吳上人還台州

挂錫遙憐野寺鐘，赤城何處問芙蓉。
歸心千里月千里，行色一重山一重。
霞洞春深多藥味，石橋雲斷少人踪。
秋風紅葉桃花似，此日相期谷口逢。

新秋寄德隣

一雨兼旬水沒塍江村涼思陡然增鴻來雁去非迎送
扇故衣新豈愛憎遠戍有書終可到小樓無賦且須登
不知明日還晴否船過湖南聽采菱

謝戴江父惠江瑤柱

異味分甘及病饕令人斷酒不能牢玄胎剖出雲閒月
細殼熬翻海上濤春雨河豚忘下筯曉霜郭索罷持螯
東坡尚未知名字媿美空將荔子褒

寄林好謙

青青滿座競唔呶坐穩烏皮候日西
墻裏竹生虛室暗
門前水長大橋低故園風雨今宵夢
別館烟霞舊日題
相憶尚憐餘病惱無由蠟屐走深泥

遊天童寺

青松廿里萬松關小白前瞻太白山
度嶺路迷黃葉裏
隔溪人語白雲間海龍護法聽金磬
野鹿參禪獻玉環
老衲相留成信宿浮生幸得此偷閒

示德鄰

風雨春寒起讀遲傷心門外落花飛裁詩摠拙猶排悶
識字徒多不救饑今日山林容我在舊時城郭歎人非
年來苦憶鴟夷子散髮扁舟久未歸

寄題黃巖張氏隱居

天台佳氣鬱龍蔥中有留侯慕赤松繞屋溪聲長落水
對門雲氣悉成峰果林秋熟猿將子藥圃春肥鹿長茸
幽討莫辭行路遠穿雲已辦竹枝筇

雨後登樓寄舒仲權

獨凭危樓雨後窓
孤村一曲繞春江
白雲低壓青山半
綠水交飛紫燕雙
落日船歸桃葉渡
晚風人唱竹枝腔
抱琴有憶能相過
猶及殘紅撲酒缸

題畫馬

曉向天門立仗歸
驕嘶誰與脫金鞵
鑾輿近日稀巡幸
閒放春隄苜蓿肥

題宋徽宗畫竹

宣和殿下碧琅玕月影風聲豈耐寒一自江南栽老檜
誰將消息報平安

題畫

溪頭春水碧粼粼溪上春山絕點塵不信白雲都占盡
也應茆屋有閒人

至孝李先生悌謙

以字行生平孝友見前傳李氏一門至行並擅文章
惟少弟忠謙客死遼左幼安不返德言失傳誠可歎

也因并誌之

東門行

朝入東門城試作東門行東門小吏打道開馬前高喝
將軍來將軍馬上錦繡袍妙年三十纔向高自信勲勞
邁頗牧常將意氣凌蕭曹紫騮一匹天子賜新鞵金鞍
搖玉轡腰下長懸兩石弓腹中豈貯三千字清時較獵
城南隅旌旗蔽野人塞塗一時蒼皇爪牙奮百里飛走
影響無歸來升堂設綺席列坐擊鼓吹笙竽金鳳釵橫

翠翹起嬌娥一雙顏色都藏鬪呼取銀錯落按節舞蹈
紅矍踰蠟炬高燒白于晝樂事已徧清夜徂君不見窮
巷書生讀書苦一生身被儒冠誤不思學劍求出身閑
門猶擬長楊賦

春社

今日報春社風光處處同社公三日雨花信幾番風野
老還祈穀村醪可治聾醉歸茆屋卧花月淡朦朧

八月廿夕起東軒步月

今夕何夕耿無眠攬衣起聽更漏傳中秋能隔幾夜遠
明月已減三分圓雲開數雁影帖地露冷獨鶴聲徹天
心情未覺坐來倦燒燈更讀離騷篇

夏日雨中

風雨蕭蕭水滿邨迴無人跡過柴門重來海燕經年客
漸長庭篁幾世孫已分生涯甘淡泊却憐交友絕寒暄
白鷗日日江頭見心事相忘不復論

至行謝先生矩

字元規父思恭生二子長員字友規次即先生兄弟
俱有文名先生少奉父命為人後而員以諸生充臬
掾赴京師後改四川謫戍臨洮調涼州播遷有年且
道里絕梗遠非日月可至先生嘗裹糧走萬里資送
終其身不輟後以例籍父及妻子俱赴戍所獨先生
以別籍免喟然曰吾忍使父與嫂姪獨困苦耶力請
與偕至吳門父死先生哀毀幾絕或勸之火輒號哭
曰此末俗事雖倉卒吾忍乎乃以父柩厝客舍相

嫂姪至京師遇例家人得放還遂復至吳門迎柩歸
塋次年兄沒戍所又間關數千里負其骨歸撫諸姪
益至先人田廬悉畀之諸公俱高其孝友篤至名所
居曰孝義堂兄友規初調臨洮時解公大紳方謫河
川衛吏翰林待詔潘若水亦黜為西寧行太僕寺吏
解公名重若水能詩著退菴集友規工文著鳴窮集
關中因有吏中三傑之稱友規所傳二文其口毒荅
一篇詞義最善詳水東日記

余嘗讀元規傳輒歎曰先生斯可為至行矣與同時
李孝謙兄弟孝友篤相類兩家復擅文章為吾里光
華誠所謂有德之言也或曰元規為兄友規為弟元
規曾孫汝儀字國正以進士官雲南叅政事大母篤
孝能世其家

賦望郎回山

望郎回望郎回望郎不回心欲摧化作山頭一拳石質
堅不朽心不灰花開花落秋復春茆然獨立誰與鄰夜



深惟見皎皎月雨晴只有英英雲將心誓比雲與月雲
有卷舒月圓缺百年夫婦終古心豈辨新離與故別此
心炯炯天地知山高水深終相期郎君應有歸來時

溪雲堂為陸進士作

卜築依林澗雲深若洞天無心來遠岫有派自深泉鶴
舞添晴影松鳴動壑絃道人名利澹對此足忘年

次錢廣文感懷

茆齋清味自來甘飲半吟哦日醉酣為問洛陽賢令尹

閉門風雨幾人諳

栖芸楊先生範

字九疇浩卿子也體長美風儀進止有尺寸生平操
行誠確雖燕居常盛服端坐讀書至丙夜通易詩書
三經潛心聖學視當世毀譽榮辱漠然也楊氏初饒
財至先生家益落常授經里中諸生凡在先生門俱
能學古尚氣節自立人望之知為楊氏門人也郡守
鄭珞鄞令張鐸每歲時嘗造其門聘修實錄者三郡

乘者一俱為總裁晚年造履彌篤卒之歲自銘其墓
曰少而慕古壯而學古老而益好古吾之行也所著
道統言行集栖芸橐諸書于詩咏物最多洪武初先
生嘗任轉輸至京同郡桂公彥良一見奇之曰君豈
此中人耶先生遂益自勵時郡中宿學有洪先生敬
道周先生禮黃先生潤玉諸人先生師事洪氏與賸
菴南山稱執友故其學最為有本時稱栖芸先生

九月旦湖上偶興

涼氣蕭蕭菊月初暫休講席過瞿湖芙蓉露濕連枝錦
攏桹風搖滿穗珠水面魚游人可數沙頭鳥跡我能摹
此時埜興渾無極回首俄驚日已晡

鏡川

斜日一輪山上頭輕霞片片漾波流平蕪埜岸碧千畝
喬木人家紅半樓沙鳥頻翔將下宿田夫晚濯欲歸休
漁舟各已收緡去漸有燈明蘆荻洲

春菊

即蒿菜花

東風園裏菜花開，却做秋英一樣猜。
此際正經紅雨落，于今未見白衣來。
圓栽金葉錢，無貫高吐檀心粟。
作堆待看南薰成實後，栽苗依舊薦香醅。

耕隱軒為胡拱辰作

年來力穡是生涯，任爾蕭蕭髮半華。
負郭有田都種稻，繞門無地不栽花。
一犁雨足春無耒，數葉烟生曉煮茶。
驥子讀書功益進，未應終作老田家。

松醪

五鬣蒼龍釀綠醅
槽頭注雨色如苔
大夫遷治酒泉郡
髯叟重為麴秀才
味自茯苓浮瓦甕
光從琥珀泛霞杯
歲寒一醉同椒柏
能使春風生滿腮

先長清處士

諱迪字叡迪更號長清處士嗣之五世祖也家自二
世祖成連先生四世祖肅齋先生始以經學世其家
處士少讀先世藏書能傳其學工于詩性篤孝友
人溫恭有蘊藉行善里中常衣寒食饑病者為具五

藥死而無歸者衾棺之身敦禮讓以教法子孫行于鄉黨人慕其德比于太丘平原晚年閉門教授所從受業俱一時名士每暇日則負琴載酒招儒林士大夫與登崇丘坐茂林觴咏相答以共樂太平年七十二卒于家里中耆舊哭之哀其行事具詳錢方伯與兵部洪公常叙傳中

吾鄉以詩學世其家若楊氏自浩卿栖芸復之諸先生四世而後顯張氏自東皋洞雲諸先生三世而後

顯吾家自長清櫟軒棟塘諸先生四世而後顯至今
三百年子孫尚能傳其業不衰蓋吾鄉論詩至諸先
生始見風格不第家學發源即在里中亦殊有闡草
昧之功也

吾家既世授經所從交遊復俱里中宿老故所傳哭
長清處士詩每得名作其見此選者已數家以外佳
句如金騰曰烏几陳千載龐眉守六經齊政曰靜氣
衣中古閒心魚鳥熙倪光曰柴車已斷山庭路劔草

空深墓碣烟滅。琚曰：雲偃雙扉，蒼竹徑月寒一棹白。
鷗汀金溥曰：葉落洞門秋寂寂。花踈菊岸雨冥冥。范
麟曰：興來蔽竹常開甕。老去看山不下樓。俱足傳也。

對雪

虛堂披筆坐來輕。暮雪紛紛落漸盈。人過灞橋來有跡。
鳥歸梁苑下無聲。閉門只合終朝卧。放櫂應須半夜行。
自起捲簾閒縱目。橫塘水白路分明。

荅友人

紫崖丹壑徧烟嵐惆悵無人駐
鶴驂讀罷小山招隱賦
欲將消息問淮南

郊遊

步屨隨風處處扶
林花掩映尚前途
兒童也喜尋春客
說與東村賣酒壚

東臬張先生懽

字汝誠風儀修整好讀書
坐一小閣每竟日不下堂
署其壁曰不同于今人我之樂
不同于古人我之憂

俯仰自得淡如也生平多篤行嫻族有佃先生田者
歲不輸穀乃并其田與之鄰人盜先生困粟多或以
告先生曰吾初無所亡也天旱家人括河魚以歸先
生惻然曰枯魚方泣奈何盡其族耶為擇水深處放
之既絕意仕進所居草堂未嘗有車馬跡唯里中故
人梁衡數輩日造酒坐賦詩時相招買犢入市遣僕
乞蔬苗作小簡往來俱有風味堂邑穆孔暉叙其東
臯集曰先生詩其旨和平其音格古雅其事不出事

親求友田畝圖籍間有山川之樂而意不狂處布衣而能得幽人之古其風流可彷彿也

即事

南園夏日長清陰蔽亭臯虛簷鳥雀噪隔水玄蟬號
彼兩文禽振浴迴塘坳脩翎激晴波和鳴聲交交我欲
弄此鳥惜哉無輕橈懽悅發長歎展翮已翬霄盼盼形
影絕徙倚徒煩勞

高桐倚崇岡托根金井西交柯結層陰上與浮雲齊儀

鳳久不至衆鳥安敢栖烈烈爨下聲惜哉知音稀

春日有感

桐琴橫床鶴劍立人對青山春寂寂素衣獨舞東風前
古絃重張彈未得罷援惆悵起悲歌美人皎皎凌江波
梅花欲開隔窓語雨聲一夜春寒多

上日立春

吾皇臨御始正朔喜逢春霏雪占豐歲調元荷聖神符
桃隨意換盤菜逐年新獻壽衡門下熙然太古民

九月一日懷梁友蘭不至

兩日春風話清秋
喜更陪好詩
方滿壁佳節復登臺
燈火宵堪續
軒車雨不來
惟應對搖落
東望亦裴回

四月三日

未盡傷春酒一杯
微風吹雨又南來
浮雲心事何曾定
逝水年華更不回
數尺粉梢添穉竹
一簾香葉長高槐
博山無火清薰度
何處薔薇昨夜開

贈天童詩僧讓公

自聞方外說天童夢繞青山廿里松珍重能詩老支遁
尋常結社勝爐峰傳書度海朝憑鶴擊盜臨江夜擾龍
今日東風花縣裏解衣留偈得從容

病中

共言人事能催老一病催人老亦成已信百年如轉燭
肯教方寸若懸旌青燈夜雨頭新白黃菊秋風眼暫明
寂寂草堂誰慰遣坐看山鳥下堦行

東臯詩

川澤冲融土厚渾幾家耕織共晨昏地連源上桃花水
門對城南櫟樹村暇日引兒歌百穀良時留客宴朋尊
分明古舍田園興安得陶公與細論

清明日感懷

自入春來不肯晴幾番風雨逼清明病餘蓬巷又花落
人靜茆堂惟燕聲川路久無舟可涉石田方歎犢難耕
松楸望望何時埽滿眼新烟空淚橫

和梁士平江北見寄


先生碧眼慣看天最愛江湖景豁然佳句遠尋流水外
短筇閒拄白鷗邊夕陽茅屋誰沽酒明月蘆花好放船
二十年前舊游路因君悵望立寒烟

寄靜者

種得園成鬢已華葛巾風致勝烏紗坐來半月層城雨
吟遍今春幾逕花埜外漁樵閒作客雲中雞犬自為家
紅塵隔水多游騎應指垂楊羨釣查

南園莊

瀟洒南園一畝莊
頻年種藝學柴桑
閉門花雨鶯啼過
捲幔薰風燕入忙
紅葉但書酤酒券
白雲長護采蔬筐
秋成頗為山田薄
餐過東籬菊數行



甬上耆舊詩卷四